

Gui'ch guxhaal San Pabl loj ree b n  feso rliladx Jesucrist

Rugajpdioz San Pabl b n  feso ree

¹ Naj Pab, najn tijb xi ap stol Jesucrist por xgualrniabee Dios. Cucan gui'ch guie par l jt guial diidxli zinalidi xtiidx Jesucrist, l jt guial ma najdi xbejn Dios luguiedx  feso.

² Dux Dad ree Dios n  Dad Jesucrist g  nle' l jt yabe'cdxe t   reeman luxdoodi.

R jnle' Dios b n rliladx ree Jesucrist

³ Quixt   Dios, xdad Dad Jesucrist, d d benza'c najman, guial yan ma nayajc ree tijbzi con Jesucrist, ma beenle'man dunuj ree diizd xanyabaa con graloj guialnaza'c din gac yunaal ree xtiidxaman.

⁴ Laaman bacaabee dunuj ree por Dad Jesucrist diizd chi gad guidxliuj gacchaaw din yabajn ree naya sin dol lojman.

⁵ Abi' guial r nman dunuj ree, diizd guia'xchej beenman guial yayajc ree xi'nman por Jesucrist zi'c beenman xgab gac.

⁶ Zeel ad racw  zt raza't ree Dios zagdxo guial d d benza'c najman, ma beenle'man dunuj ree por Xi'nman Jesucrist, b n r nman,

⁷ b n ma gudijx por dunuj ree chi guxie' xrejnman, abi' ma gojc perdon dux tol ree guial d d r n Dios dunuj ree.

⁸ Zeel dád zro' guialrajc në guialrignia' ma bazaladxaman duloj ree,

⁹ abi' ma balüüman duloj ree xhienaag naj xixgabaman diizd gocli, zi'cgajczi ma beenman xgab gac.

¹⁰ Guiáad xgab guin gacan cumplid chi guidxin dxej, Dios gusa'n gra loj Jesucrist zi'c ni yu' xanyabaa në loj guidxliuj.

¹¹ Nëtëë guial nayajc ree tijbzi con Jesucrist, Dios ma bacaabee dunuj ree din yayajc ree par laaman zi'c naj xixgabaman diizd guia'xchej, din laaman rüjn gra zi'c rënman gac.

¹² Abi' laaman ma been zian, din dunuj ree nayajc ree bén yaloj bililadx Jesucrist, yayajc ree bén guza't laaman zagdxe por xguialrniabeeman.

¹³ Négajc lëjt chi biguiejndi diidxli xhienaag par gaquidi perdon dxel bililadxidi Cristo gojquidi tijbzi con laaman. Abi' zi'c rëb Dios guial gunee-man xSprijtaman, dxel yan guial ma nabannëdi laaman, laaman naj zi'c tijb sen ni rulüü guial ma najdi par Dios.

¹⁴ Guial ma nabannë xSprijt Dios dunuj ree, yaca' ree ni rëb Dios gunee-man chi ma bara xbejnman za' xanyabaa, din chitëë yacwëöz yaza't reeman zagdxe por xguialrniabeeman.

Rniab Pab quiarguejn loj Dios

¹⁵ Abi' guial ragbeen rliladxidi Dad Jesús rën tëëdi los demazri ree bén naj xbejn Dios,

¹⁶ zeel ad rucwëözt rudën quixtëë loj Dios por lëjt, beegaj rbedx rniaaban laaman.

17 Laaman naj Dios rniabee diizd xanyabaa, xDad Dad Jesucrist. Rniaaban lojman yazaladxaman quiarguejn lojdi din chignia'di ni gulüüman lojdi gusnuu tée güünbeedi laaman mazri.

18 Rniaaban lojman din guixhialaman xquiarguejndi din chignia'di xhie rën guiëb ni rbëzidi diizd chi bacaabeeman lëjt, chignia' tée di guial ni za'cdxoon narooob tée naj ni nagu'chaaw Dios par ree bén naj xbejnman.

19 Rniaab tēn lojman guial gagbeedi guial dád narooob naj xguialrniabeeman ni cayagnë dunuj ree raliduladx reeman. Laagajc guialrniabee narooob guin balüü Dios

20 chi basbanman Jesucrist abi' gule'caman laaman xladbeeman xanyabaa

21 lod badëëman guialrniabee lojman ni mazri lasajc guial loj gra ree guialrniabee, në loj gra guialguxtis në loj gra gobiarn. Abi' mazri lasajc guialrniabee guin guial loj gra ree guialrniabee yu', në ni qui chu'ri ree loj guidxliuj guie.

22 Dxel basa'n Dios gran loj Jesucrist, bacaabeeman laaman din nabeeman gra ree bén rliladx laaman.

23 Guiáad ree bén rliladx laaman, guidiblagaa nabannëman laa reeman abi' bantëëz guin za'man din laaman guidiblagaa rniabee.

2

Nayajc ree perdon guial rën Dios dunuj ree

1 Gocli gojquidi zi'c bengüt loj Dios por ree ni mal në por ree dol

² ni beendi guial binalidi nejz mal been tëëdi zi'ctzi rën xindxab güündi, sprijtmaal ni nabannë gajc ree bèn ad ruzoobt xtiidx Dios.

³ Du gra ree ziangajc babajn ree guia'xchej. Baguieen ree zi'ctzi bayën ree, zi'ctzi goc dux xgab ree, abi' zi'cgajc rayal ree bèn ad ruzoobt xtiidx Dios casti, ziangajc nayal ree casti.

⁴ Per guial raya da't Dios dunuj ree rën tëëman dunuj ree,

⁵ zeel majsi bayajc ree zi'c bengüt lojman por dux tol ree, per yan ma raya'p ree guialnaban lojman con Jesucrist. Guial tant benza'c naj Dios, zeel nayajc ree perdon.

⁶ Chi basbanman Jesucrist nëgajc dunuj ree basbanman abi' zi'c rulüü ma nadxu'në' ree Jesucrist xanyabaa.

⁷ Dios been zian din dxej zëed ree guiguien guial dád rënman dunuj ree, abi' benza'c tëë najman con dunuj ree por Jesucrist.

⁸ Guial naj Dios benza'c, zeel ma nayajc ree perdon, ad guial nayajct ree benza'c lojman. Por guial rliladx zëed xperdon Dios.

⁹ Ni'quid por ni zagdxe ni ma baguieent ree zëed perdon guin chitëë chu guilies xvalor gajc.

¹⁰ Por Dios nadxu' ree loj guidxliuj guie abi' por Jesucrist bachaaman mod babajn ree yaloj din yaguieen ree ni zagdxe zi'c beenman xgab yaguieen ree diizd gocli.

Tijbzi nayajc ree por Jesucrist

¹¹ Zeel lëjt bèn ad najt ree bèn Israel, gol basaal-
adx xhienaag guzajquidi yaloj. Bèn Israel ree

gulëelaj lëjt bén ad yu't ree sen guial yu' reeman sen zi'c rniabee ley.

¹² Tiamp zii ad beenbeetidi Jesucrist, ad gojctidi cwent loj ree bén Israel ad gojc tëetidi cwent guial rayalidi ni rëb Dios gudëëman loj ree xbejnman. Contzi gubajndi achet gulëjzidi ad gubajnnë tëetidi Dios.

¹³ Per yan guial ma rliladxidi Jesucrist, lëjt guial guzujdi zijt loj Dios, por xrejñ Jesucrist ma bibigu-idi lojman.

¹⁴ Din Jesucrist babe'cdxe du luxdoo ree. Laaman bisüd guialrdxe'ch ni rudxoon gac ree bén Israel tijbzi con ree bén ad najt bén Israel.

¹⁵ Abi' por xguialgüjt Jesucrist gulox gra ree costumbr rniabee xley ree bén Israel güün ree bejn, laaman been persi gojc ree bén Israel con ree bén ad najt bén Israel zi'c tijbzi guiedx cüb guial ma nayajc ree tijbzi con laaman. Zian babe'cdxeman luxdoo ree bejn.

¹⁶ Din por xguialgüjt Jesucrist loj crüjz ma gulox guialrdxe'ch lasa' ree bén Israel con ree bén ad najt bén Israel, abi' ma nadxu'në' ree Dios zagdxe guial ma nayajc ree tijbzi por Jesucrist.

¹⁷ Abi' laaman bidgagojn dugra ree, zi'c ree bén Israel zi'c ree bén ad najt bén Israel xhienaag yadxu'në' ree Dios zagdxe.

¹⁸ Dxel por Jesucrist grop cwaa ree bejn ma rajp nejz par loj Dios guial tijbzi naj xSprijt Dios nabajnnë' ree.

¹⁹ Zeel ad najtridi zi'c bén zëed lod ren, zi'c benzit loj Dios, ma najdi cwent loj ree xbejnman, ma najdi tijbzi con ree xbejnman.

²⁰ Lëjt naj zi'c xze' tijb yu ni cayajc, guiáad ree

xi apóstoles Jesús con ree bën badëë xtiidx Dios loj ree bejn, naj reeman zi'c xcimiant yu guin, guiáad Jesucrist naj zi'c guiaj zojbloj ni cayajcnë yu guin.

²¹ Abi' guial yagaj guzuloj cayajs yu guin, dxel cayë'pzi cayë'p ze' guin ni cayguie'ch ree najdi din yayajc ree tijbzi xyadoo Dios con Jesucrist.

²² Në yan guial ma najdi tijbzi con Jesucrist ma naj tëedi tijbzi con los demazri compniar raliduladx reeman din yayajc ree tijbzi yadoo lod za' Dios por xSprijtaman.

3

Cwabee Pab din chigneeman xtiidxza'c Jesucrist

¹ Por zianan yu'n ladxguiib, naj Pab guial cayünan sirv loj Jesucrist din günan yudar lëjt bën ad najt ree bën Israel.

² Lëjt ragbee guial naj Dios benza'c zeel baneeman dxiin guin lon din günan lëjt yudar chignia'di xtiidxaman.

³ Abi' laaman balüü naj xhienaag naj xixgabaman diizd gulal, zi'cgajczi ma rnin lojdi diizd guia'xchej.

⁴ Chi goolidi laan, gagbeedi guial ma ragbeen xhienaag naj xixgab Dios par Jesucrist.

⁵ Tiamp gulal achut gojc niagbee xhienaag naj xixgabaman par Jesucrist, gojcan zi'c tijb ni naguie'ch par ree bejn. Per yan por xSprijtaman ma balüüman laan loj ree xi apóstoles Jesús në loj ree bën badëë xtiidx Dios loj ree bejn.

⁶ Abi' ni goc zi'c tijb ni naguie'ch par ree bejn naj guial por xtiidxza'c Jesucrist, në ree bën ad najt bën Israel ma rayal ni gudëë Dios loj ree bën

Israel guial ma naj reeman tijbzi, dxel ziangajc ma nayab reeman loj promejs ni been Dios por Jesucrist.

⁷ Naj cugojn xtiidxza'c Jesucrist loj ree bejn, ad guial rayalt ǵunan dxiin guin. Guial naj Dios benza'c, zeel bazaladxaman guialrniabee lon par ǵunan laaman sirv.

⁸ Naj naj b́en bigra b́en lasajc ta'nz loj gra ree xbejn Dios, per guial naj Dios benza'c, bacaabee-man naj din ǵun diidx loj ree b́en ad najt b́en Israel xcwent xguialnaza'c narooob Jesucrist,

⁹ ńe par gugojnan zagdxe gra reeman xhienaag naj xixgab Dios b́en been gra, xgab ni ad balüü gajtaman loj ree bejn.

¹⁰ Din yan zi'c naj ree b́en rliladx Jesucrist, gag-bee gra ree b́en rajp guialrniabee xanyabaa guial gra lojczy guialrajc rajp Dios.

¹¹ Abi' diizd chi gad guidxliuj gacchaaw mal been Dios xgab guial gac zian. Yan ma gojcan cumplid por Dad Jesucrist.

¹² Ńe guial raliduladx ree Jesucrist ma raya'p ree nejz par loj Dios, abi' con confians ma zajc yubiig ree lojman.

¹³ Zeel rnin lojdi ad runayadi por ree guialzi ni cadëedan por lëjt, din zagdxen par lëjt.

Dád rën Jesucrist dunuj ree

¹⁴ Zeel ruzuxiban loj dux Dad ree Dios;

¹⁵ laaman naj Dad loj gra ni yu' loj guidxliuj ńe xanyabaa.

¹⁶ Abi' rniaaban lojman por xguialrniabee narooobaman yazaladxaman lëjt gojl ńe guialrniabee por xSprijtaman din yayu luxdoodi,

¹⁷ guibannë täädi Jesucrist guial rliladxidi laaman. Din zian zi'c diidxli zinalidi zi'c rën Jesucrist dunuj ree,

¹⁸ dxel ma zajc gagbeedi con los demazri ree compniar raliduladx ree laaman guial gudëdlaj abi' xt banczi naaløj zro' rënman dunuj ree.

¹⁹ Zeel rniaaban loj Dios gagbeedi plact rënman dunuj ree, guial mazri zro' najn guial loj ni raguieen ree xgab, abi' zian guidiblagaa guibannëdi Dios.

²⁰ Laaman, guial rajpaman guialrniabee par güünman mazri guial loj ni raguieen ree xgab o mazri guial loj ni ranaab ree lojman por xSprijtaman bën nabajnnë' ree,

²¹ abi' rayal yaza't reeman zagdxe gra dxej në gra tiamp por Jesucrist, dunuj ree guial raliduladx ree Jesucrist. Amén.

4

Nayajc ree tijbzi por xSprijt Dios

¹ Naj, yu'n ladxguiib guial cayünan sirv Jesucrist, rniaaban lojdi zi'c ma najdi xbejn Dios, gol gubajn zi'c rayal guiban ree bën ma naj ree xbejnman.

² Gol gojc benza'c në bën naxanladx, gol gojp pacens gol gudaan tää lasa'di guial rën lasa'di.

³ Gol been naguiejn gusnuu gaquidi tijbzi con xyudar xSprijt Dios bën rabe'cdxe du luxdoo ree par yayajc ree tijbzi.

⁴ Dunuj ree nayajc zi'c tijbzi cuerp, abi' dugra ree nabajnnë' xSprijt Dios, abi' zi'c ma nayajc ree xbejn Dios, ziangajc ralëjz ree ni guneeaman.

⁵ Tijbzi Dad, tijbzi guialrliladx në tijbzi guialrriobnijs raya'p ree.

⁶ Din tijbzi Dios yu', bén naj Dad par dugra ree, rniabeeman dugra ree, nabannëman dugra ree rüjn tëëman ujs dugra ree.

⁷ Per tijb gaj dunuj ree ma naj ni yaguieen ree, zi'ctzi ni banee Jesucrist yaguieen ree.

⁸ Zianan zeel rëb loj xtiidx Dios:

Chi bayë'paman xanyabaa,
beenman gan loj gra guialrniabee,
abi' badëëdaman loj ree bejn ni rayal güün reeman.

⁹ Abi', ¿xhie rën guiëb lod rëb “bayë'paman”? Rën guiëban bi'taman loj guidxliuj.

¹⁰ Guiáad Jesucrist bén bi't loj guidxliuj, laagajcaman naj bén bayë'p xanyabaa persi canabee-man guidib guidxliuj në xanyabaa.

¹¹ Abi' ma badëëman loj ree bejn ni rayal güün reeman, yu' reeman bayal gac apóstoles, yu'za reeman bayal gac bén rudëë xtiidx Dios loj ree bejn, yu' reeman bayal gutie'ch xtiidxaman, yu' tëë reeman bayal gudëë consejw gulüü tëë reeman bén rliladx ree laaman.

¹² Zian bacaabee Jesucrist bejn ree din gusiid los demazri ree bén rliladx laaman, gac tëë güün reeman laaman sirv, gusnuu tëë güünbee reeman laaman,

¹³ xt yayaaløj yaliduladx ree yaguieenbee tëë ree Xi'n Dios guidiblagaa, din yayaaløj yayignia' ree xhienaag rayal yunaal ree Jesucrist.

¹⁴ Dxel ad zayajctri ree zi'c ree xindoo rliladx xhietëëznin, ad zayajctri ree zi'c tijb ni rnë bi niz ni niz guie por graløj ni rü ree bén raguuil mod gusquiee ree bejn,

¹⁵ rayal yayèn du lasa' ree, yadü ree diidx yu-naal tää ree ni diidxli din gusnuu yayignia' ree yaguieen tää ree zi'c rën Jesucrist bèn rniabee dunuj ree.

¹⁶ Din por Jesucrist nayajc ree tibloj gra ree compniar raliduladx ree laaman. Por laaman nadxajg dulasa' ree nayajc ree tijbzi, abi' tijb gaj dunuj ree con ni rayal yaguieen ree par yaguieen du lasa' ree yudar din gusnuu yayèn dulasa' ree por Jesucrist.

Guialnaban cüb con Jesucrist

¹⁷ Yan por Jesucrist rnin lëjt: Ad bal guibanridi zi'c naban ree ben ad nünbeet Dios, din laa reeman naban zi'ctzi naj xixgab reeman,

¹⁸ nacay xquiarguiejn reeman, ad rajpt reeman guialnaban rën Dios gap reeman, guial ad rignia't reeman ache tää naladx reeman.

¹⁹ Ma been luxdoo reeman gojl, ma gulëeladx laagajc reeman abi' cusnuu cayüjn reeman graloj nidxuudx.

²⁰ Per lëjt ad beenbeetidi Jesucrist din guibandi zian,

²¹ bal walidi ma biguiejndi xcwentaman bal wali täädi ma basiididi diidxli zëed por laaman.

²² Gol basa'n zi'c gubandi yaloj, din ruxhiinzi zi'c gubandi yaloj con xgabmal ni basquiee lëjt guial beendi zi'ctzi guyëndi.

²³ Gol been naguiejn guidxaa xixgabidi guidi-blagaa

²⁴ din gaquidi zi'c tijb bencüb been Dios zi'c rënman, con tijb guialnaban naya në zi'c rayal por xdiidxliman ni ma biguiejndi.

²⁵ Zeel ad bal rnieeridi diidx rusquiee. Gol gunee diidxli con xcompniaridi din tijbzi nayajc dugra ree con Jesucrist.

²⁶ Bal rdxe'chidi, ad güündi dol. Ad gudxe' guial-rdxe'ch guin luxdoodi dēchej,

²⁷ chitëë tiëbidi güün xindxab lëjt gan.

²⁸ Bén rban, rayal gucwëëz cwanman abi' güünman dxiin, din con dxiin zagdxe güünman dxel ma rajpaman con xhie güünman yudar bén ryaadx ree xhienin.

²⁹ Ad rniee tēedi diidxguijdx, gol gunee ganax diidxzagdxe ni güün yudar chignia' ree ben ren bén gucaagdiajg ree laan din güünan laa reeman sirv.

³⁰ Ad rgu'nayadi xSprijt Dios, bén ma nabannēdi zi'c tijb sen guial ma najdi xbejnman par dxej ni guidxindi lojman.

³¹ Gol basa'n tiblād gra guialralenya', guial-rdxe'ch, guialralen lasa', guialrguidxa'nē lasa', guialrniee diidxguijdx loj lasa' nē graloj ni mal.

³² Gol gojc benza'c, gol baya lasa'di gol been tēë lasa'di perdon zi'c been Dios lëjt perdon por Jesucrist.

5

Zi'c rayal guiban ree Xi'n Dios

¹ Zi'c ma najdi xi'n Dios bén rēnman, gol been naguiejn güündi zi'c laaman.

² Gol gubajn zagdxe, gol guyën lasa'di zi'c guyën Jesucrist dunuj ree abi' bayü laagajcaman güjtaman por dunuj ree, gojcaman zi'c tijb gon ni rliaa nejxh par Dios.

³ Yan lëjt guial ma najdi xbejn Dios, ad rayalt guinee loj lasa'di diidx dxuudx, ni'qui graloj ree ni ad rüjnt sirv ad rzëëbladx tëedi gra par lëjt.

⁴ Ad rnieedi diidxguijdx ree, diidxont ree, diidx ni ad rayalt guineedi din ad ni zagdxet reen. Mazri zagdxex gol badëë quixtëë loj Dios.

⁵ Din lëjt ma ragbee guial ree bén naban nadxuudx në ree bén rüjn ni ad rüjnt sirv, në ree bén rzëëbladx gap gra (mazri yu'guijc reeman ni guin ree luar guiën reeman Dios), dxel ad zile't chu' reeman lod rniabee Jesucrist con Dios.

⁶ Gol gojp cudad achu gusquiee lëjt con ree diidx ad rüjnt wen, din por ree ni guin zëed xcasti Dios par ree bén ad ruzoobt diidx.

⁷ Zeel ad güündi zi'c rüjn reeman.

⁸ Gocli gubajndi zi'c tijb bén nayaaw xquiarguejn, per yan guial ma najdi tijbzi con Jesucrist, laaman naj biani par lëjt. Zeel gol gubajn zi'c ree bén ma zinal biani guin,

⁹ din guial chinal bejn biani guin ma zile' güünman ni zagdxex zi'c rayal, në ni naj diidxli.

¹⁰ Gol been naguiejn gol been zi'c ruladx Dios.

¹¹ Ad në lëjt güün ni ad rüjnt ree sirv ni rüjn ree bén nayaaw xquiarguejn, gol guneenë reeman din gagbee reeman ni rüjn reeman.

¹² Din xt ratu bejn güman ni rüjn reeman ralan.

¹³ Per por xtiidx Jesucrist laa gagbee gajc reeman xhienin rüjn reeman.

¹⁴ Din zianan zeel rëb loj xtiidx Dios:

Batie'ch xbaaalil, lüj guial zinalil nejz mal.

Bariica loj dol din gusni Jesucrist xquiarguejnl.

15 Zeel gol gojp cudad xhienaag nabandi, ad gontzi guibandi, gol gubajn zi'c bén yu' xquiar-guiejn.

16 Gol been naguiejn guibandi zi'c rayal naga yu' tiamp, din lën ree dxej guie ad xnejztri naban bejn.

17 Zeel ad gontzi nabandi zi'c naj xixgabidi, gol beenli naguiejn chignia'di xhienaag rën Dios guibandi.

18 Ad südxidi, din guialrzüdx guin ruxhiin bejn. Zagdxeli gol cwëjb nabee xSprijt Dios luxdoodi guidiblagaa.

19 Chi rünë lasa'di diidx, gol baza't ni ca loj ree salmos, loj ree himno, në gra loj ree cant ni naj par Dios. Abi' guidib luxdoodi gol biil gol baza't tëë Dios zagdx.

20 Abi' guixie guixie gol badëed quixtëë loj dux Dad ree Dios por Dad Jesucrist por gra ni rünman par dunuj ree.

Zi'c rayal guibannë lasa' ree bén rliladx Jesucrist

21 Gol bazoob xtiidx lasa'di por respejt ni rajpidi Jesucrist.

22 Në lëjt béngunaa nuxhliaa, gol bazoob xtiidx lacheelidi zi'c ruzoobidi xtiidx Jesucrist.

23 Din xinguaaaw ree rniabee lacheel zi'c rniabee Jesucrist bén rliladx ree laaman, bén babëë laa reeman loj dol abi' naj reeman xbejnman.

24 Abi' zi'c ruzoob ree bén rliladx Jesucrist xtiidxaman, ziangajc ree béngunaa rayal guzoob xtiidx lacheel reeman.

25 Nëgajc lëjt xinguaaaw nuxhliaa ree, gol guyën lacheelidi zi'c rën Jesucrist bén rliladx ree laaman, abi' xt güjtaman por laa reeman

²⁶ persi bisüdaman xtol reeman, basiaman laa reeman por xtiidxaman nē por guialrirobnijs,

²⁷ din guidxin reeman lojman nix da't nē ni'qui tijb ni mal, sin falt o dol ren ree, guidxin reeman lojman nayadxuj sin dol.

²⁸ Yan ziangajc ree xinguaaaw baxhliaa, rayal guiën lacheel reex zi'c rēn laagajc reex. Abi' xin rēn lacheel, laa gajquixan rēnx.

²⁹ Din ni'qui tijb bejn ad rdxe'cht laagajcaman, ruyaani laagajcaman rniajchi' tēē laagajcaman zi'c rüjnnē Jesucrist dunuj ree nayajc ree bën rililadx laaman

³⁰ guial nayajc ree tijbzi con laaman.

³¹ Zeel zi'c rēb loj xtiidx Dios: “Xinguaaaw gusa'n xdad xniaax din gaquix tijbzi con lacheelix abi' grop reex ma naj tijbzi bejn.”

³² Dád nawēēg naj par chignia' bejn diidx guie ree, per caninan din zian naj Jesucrist con ree xbejnman.

³³ Yan, xinguaaaw ree, gol guyën lacheelidi zi'c rēn lējt gajc. Guiáad lējt bēngunaa, gol gojp respejt lacheelidi.

6

¹ Nē lējt najdi xi'n, guial zinalidi Jesucrist, gol bazoob xtiidx ree xdadidi, din zian rayal güüнди.

² Abi' mandamient yaloj ni rēb guial yu' ni yaca' ree bal yaguieen ree ni rēb: “Gojp respejt xdad xniaal,

³ din guibanl zagdxē guiban tēēl xchej loj guidxliuj guie.”

⁴ Nēgajc lējt dad na ad gusagdiaj xi'ndi chitēē guidxe'ch reex por zian. Mejorli gol basni's reex

zagdxe, gol guneenë reex gol balüü tää reex zi'c rën Dios.

⁵ Nē lējt bën rüjn ree xchiin bejn, gol bazoob xtiidx bën naj xpatrondi loj guidxliuj guie. Con guidib luxdoodi gol gojp respejt gol bazoob tää xtiidx reeman, gol gunaladx xchiin Jesucristan cayüjndi.

⁶ Gol been reeman sirv ad chi ruguiaatzi reeman lējt par yaya'ndi zagdxe loj reeman, gol gunaladx guial Jesucristan cayüjndi sirv guial diidxli cayüjndi zi'c rën Dios güündi.

⁷ Gol been dxiin con gan, gol gunaladx xchiin Jesucrist cayüjndi, ad xchiint bénguidxliuj.

⁸ Din lējt ma ragbee guial tijbgaj bejn majsi bën rüjn xchiin bejn o bën ad rüjnt xchiin bejn, per gudää Jesucrist ni rayalaman zi'ctzi naj ni zagdxe beenman.

⁹ Nēgajc lējt bën naj ree patron, gol gojc benza'c con ree xmojsidi, ma gojczy rusagzidi laa reeman, din lējt ragbee guial bën rniabee laa reeman nē lējt yu'man xanyabaa, abi' ad rbetaman loj bejn.

Gol guzudxi'ch loj ni riladxidi

¹⁰ Rni tään lojdi compniar raliduladx ree Jesucrist, gol guzudxi'ch loj guial ma najdi tijbzi con laaman por xguialrniabee narooaman.

¹¹ Gol gojp lējt gajc con xguialrniabee Dios din sudxi'chidi chitää güün xindxab lējt gan con ree ni rusquiee.

¹² Din ad cayguieent ree naguiejn yaguieen ree gan loj tijb ni naj bëel nē dxijt, caydijl ree con gra

loj sprijtmal zi'c ree ni rajp guialrniabee, guialguxtis në gra loj xsprijt xindxab ni yu' ni canabee tëë loj guidxliuj guie.

¹³ Zeel gol gojp lëjt gajc con xguialrniabee Dios din chile' taandi xhietëëz loj guialzi gui't sudxi'ch tëëdi loj xhietëëz ni saquidi.

¹⁴ Gol guzudxi'chcliza por ni diidxli ni ma ragbeedi, gol basnuu tëë zi'c rayal guibandí.

¹⁵ Gol guzusin par guinieedi xtiidxza'c Jesucrist din por laan yadxu' ree zagdxe con Dios.

¹⁶ Gol badxe'guijc tëë guial guialrliladx ni rajpídi naj ni ragnë lëjt loj gra ni zëed por xindxab.

¹⁷ Në ni been Dios perdon xtolídi, laan naj ni rutëë lëjt, guiáad xtiidxaman naj zi'c tijb espad ni runee xSprijt Dios lojdi.

¹⁸ Ad gucwëëz cwedx guiniabídi Dios. Gol gudi'n gunab lojman guixie guixie con xyudar xSprijtaman. Gol guzusin par cwedx guiniabídi laaman, ad gucheeladxídi, gol gurejdx tëëman por gra ree xbejnman.

¹⁹ Gol gurejdx gunab tëëman por naj din yazaladxman naj diidx ni rayal ganen din ganen sin guialrdxeb xtiidxza'c Jesucrist ni zidnë perdon.

²⁰ Dios bacaabee naj par ganen xtiidxza'camán, abí' por zian yu'n ladxguiib. Per gol gurejdx gunab Dios chitëë gadxeban gün xtiidxaman zi'c rayal günán.

Diidx bigra ca ree loj gui'ch guie

²¹ Tíquico, tijb du lasa' ree bén rayën da't ree, abí' diidxli cayünman dunuj ree yudar cayguieen ree sirv Jesucrist, laaman gugojn lëjt gra xhienaag za'n xhie tëë cayünan,

²² din par zianczi caxhalan laaman din gugojnman lëjt xhienaag nadxu'n niz guie yagu' tēēman luxdoodi.

²³ Rniaaban loj Dios guial gra ree bèn rililadx Jesucrist, cwe'cdxeman luxdoo reeman guiën tēē lasa' reeman, chililadx tēē reeman laaman nē Dad Jesucrist,

²⁴ güünle' tēēman gra ree bèn wali rën Dad Jesucrist.

Xtiidx Dios
New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

fb4ebcb8-e1f4-5bfc-b08c-f590e137d86d